

Na osnovu člana 8. Zakona o ministarskim, vladinim i drugim imenovanjima Federacije Bosne i Hercegovine ("Službene novine Federacije BiH", br. 12/03, 34/03 i 65/13), Odluke o raspisivanju javnog konkursa za izbor i imenovanje jednog člana Upravnog odbora Agencije za bankarstvo Federacije Bosne i Hercegovine, V. broj 1135/2017 od 24.08.2017. godine („Službene novine Federacije BiH“, broj: 65/17) i Odluke o utvrđivanju kriterija za izbor i imenovanje jednog člana Upravnog odbora Agencije za bankarstvo Federacije Bosne i Hercegovine, V. broj 1134/2017 od 24.08.2017. godine („Službene novine Federacije BiH“, broj: 65/17), Vlada Federacije Bosne i Hercegovine, raspisuje

JAVNI KONKURS ZA IZBOR I IMENOVANJE JEDNOG ČLANA UPRAVNOG ODBORA AGENCIJE ZA BANKARSTVO FEDERACIJE BOSNE I HERCEGOVINE

I. Osnovni podaci:

Upravni odbor Agencije za bankarstvo Federacije Bosne i Hercegovine (u daljnjem tekstu: Upravni odbor), sa sjedištem u Sarajevu, ulica Zmaja od Bosne 47b, imenuje Parlament Federacije Bosne i Hercegovine na prijedlog Vlade Federacije Bosne i Hercegovine.

Upravni odbor je organ upravljanja Agencije za bankarstvo Federacije Bosne i Hercegovine (u daljnjem tekstu: FBA) koji se sastoji od pet članova.

II. Mandat:

Mandat članova Upravnog odbora je pet godina.

S obzirom da je jedan član Upravnog odbora podnio ostavku, mandat novoimenovanom članu Upravnog odbora koji bude imenovan po ovom Javnom konkursu će trajati do isteka mandata članova Upravnog odbora koji su imenovani prilikom imenovanja cijelog Upravnog odbora.

Članovi Upravnog odbora mogu biti ponovno imenovani, ukoliko ne postoje smetnje iz člana 15. Zakona o Agenciji za bankarstvo Federacije Bosne i Hercegovine („Službene novine Federacije BiH“, br. 9/96, 27/98, 20/00, 45/00, 58/02, 13/03, 19/03, 47/06, 59/06, 48/08, 34/12, 77/12).

III. Status:

Članovi Upravnog odbora ne zasnivaju radni odnos u FBA, a ostvaruju pravo na naknadu u skladu sa aktima FBA.

IV. Nadležnost:

Upravni odbor vrši opći nadzor poslovanja FBA i poduzima mjere za efikasno i racionalno vršenje poslova iz djelokruga FBA. U vršenju općeg nadzora, Upravni odbor donosi Statut FBA, donosi druge opće akte u skladu sa Statutom FBA, usvaja finansijski plan i finansijske izvještaje FBA i usvaja izvještaje o poslovanju koje FBA putem Vlade Federacije BiH dostavlja Parlamentu Federacije Bosne i Hercegovine.

Za svoj rad Upravni odbor odgovara Parlamentu Federacije Bosne i Hercegovine.

V. Uvjeti za kandidate

A) Opći uvjeti:

Kandidat za izbor i imenovanje jednog člana Upravnog odbora FBA treba ispunjavati slijedeće opće uvjete:

- da je stariji od 18 godina;
- državljanstvo Bosne i Hercegovine;
- da nije otpušten iz državne službe kao rezultat disciplinske mjere na bilo kojem nivou vlasti u Bosni i Hercegovini (bilo na nivou države ili entiteta) u periodu od tri godine prije dana objave konkursa za izbor i imenovanje jednog člana Upravnog odbora Agencije za bankarstvo Federacije Bosne i Hercegovine;
- da se na njega ne odnosi član IX. 1. Ustava Bosne i Hercegovine;
- da nije izabrani zvaničnik, nositelj javnih funkcija, savjetnik u smislu Zakona o sukobu interesa u organima vlasti u Federaciji Bosne i Hercegovine („Službene novine Federacije BiH“ broj 70/08) i Zakona o sukobu interesa u institucijama vlasti Bosne i Hercegovine („Službeni glasnik BiH“ br. 16/02, 14/03, 12/04, 63/08, 18/12, 87/13 i 41/16);
- da nije na funkciji u političkoj stranci u smislu člana 5. Zakona o ministarskim, vladinim i drugim imenovanjima Federacije Bosne i Hercegovine ("Službene novine Federacije BiH", br. 12/03, 34/03 i 65/13);
- da nije osuđivan za krivična djela koja ga čine nedostojnim za vršenje službe.

B) Posebni uvjeti:

Kandidat za izbor i imenovanje jednog člana Upravnog odbora treba ispunjavati i slijedeće posebne uvjete:

- VSS – završen ekonomski fakultet;
- najmanje pet godina radnog iskustva u bankarstvu ili na srodnim finansijskim poslovima nakon sticanja VSS (ekonomski fakultet);
- da je na tim poslovima stekao visoki ugled finansijskog stručnjaka i da posjeduje visoke moralne osobine za vršenje povjerenih funkcija;
- da mu presudom suda nije zabranjeno obavljanje djelatnosti iz nadležnosti Agencije za bankarstvo Federacije Bosne i Hercegovine;
- da nije djelatnik Agencije za bankarstvo Federacije Bosne i Hercegovine;
- da posjeduje specijalistička znanja iz bankarske supervizije;
- pasivno znanje engleskog jezika;
- poznavanje rada na računaru.

VI. Potrebni dokumenti:

Uz prijavu kandidati su dužni dostaviti dokaze (u originalnom primjerku ili ovjerene kopije) o ispunjenju kriterija iz ovog konkursa:

- biografiju sa preciznim kratkim pregledom profesionalnih aktivnosti i radnog iskustva;
- uvjerenje o državljanstvu;
- ovjerenu izjavu da nisu otpušteni iz državne službe kao rezultat disciplinske mjere na bilo kojem nivou u Bosni i Hercegovini (bilo na nivou države ili entiteta) u periodu od tri godine prije dana objavljivanja konkursa za izbor i imenovanje jednog člana Upravnog odbora Agencije za bankarstvo Federacije Bosne i Hercegovine;
- ovjerenu izjavu da se na njih ne odnosi član IX.1. Ustava Bosne i Hercegovine;
- ovjerenu izjavu da nisu izabrani zvaničnici, nositelji javnih funkcija, savjetnici u smislu Zakona o sukobu interesa u organima vlasti u Federaciji Bosne i Hercegovine („Službene novine Federacije BiH“ broj 70/08) i Zakona o sukobu interesa u institucijama vlasti Bosne i Hercegovine („Službeni glasnik BiH“ br. 16/02, 14/03, 12/04, 63/08, 18/12, 87/13 i 41/16);
- ovjerenu izjavu da li su na funkciji u političkoj stranci u smislu člana 5. Zakona o ministarskim, vladinim i drugim imenovanjima Federacije Bosne i Hercegovine (ukoliko je kandidat koji bude izabran za člana Upravnog odbora na funkciji u političkoj stranci, isti je dužan da odstupa s položaja na koji je izabran prije nego što se izvrši konačno imenovanje u skladu sa principima i postupcima utvrđenim u Zakonu o ministarskim, vladinim i drugim imenovanjima Federacije Bosne i Hercegovine);
- fakultetsku diplomu ili nostrificiranu diplomu ukoliko fakultet nije završen u BiH ili je diploma stečena u nekoj od država nastaloj raspadom SFRJ nakon 06.04.1992. godine (ekonomski fakultet);
- potvrdu/uvjerenje o radnom iskustvu u bankarstvu ili na srodnim finansijskim poslovima nakon sticanja VSS (ekonomski fakultet);
- ovjerenu izjavu da nisu djelatnici FBA;
- dokaz o poznavanju rada na računaru i engleskog jezika.

Napomena: Za kandidate koji ispunjavaju uvjete konkursa za izbor i imenovanje jednog člana Upravnog odbora, Generalni sekretarijat Vlade Federacije Bosne i Hercegovine će naknadno, po službenoj dužnosti, utvrditi da li kandidati ispunjavaju opći uvjet iz tačke V. pod A) stav 1. sedma alineja (da nisu osuđivani za krivična djela koja ih čine nedostojnim za vršenje službe) i posebni uvjet pod B) stav 1. četvrta alineja (da im presudom suda nije zabranjeno obavljanje djelatnosti iz nadležnosti FBA).

VII. Ostale odredbe

Prilikom pozivanja kandidata na intervju, svaki kandidat mora ispuniti obrazac u kojem će iznijeti bilo koje pitanje ili mogućnost koja bi mogla dovesti do sukoba interesa u slučaju da dođe do njegovog imenovanja u skladu sa članom 11. stav 2. Zakona o ministarskim, vladinim i drugim imenovanjima Federacije Bosne i Hercegovine.

Na osnovu procjene kvalifikacija i iskustva prijavljenih kandidata i obavljenog intervjua Komisija za sprovođenje javnog konkursa utvrdit će prijedlog liste kandidata.

Javni konkurs će biti objavljen u „Službenim novinama Federacije BiH“ i u dnevnim listovima: „Dnevni avaz“ i „Večernji list“.

Javni konkurs otvoren je 15 dana od dana objave u „Službenim novinama Federacije BiH“.

Neblagovremene, nepotpune i neuredne prijave neće se uzeti u razmatranje.

Ako se u roku od 15 dana sa podnositeljima prijava ne može stupiti u kontakt, nakon što Komisija za provođenje postupka izbora kandidata za izbor i imenovanje jednog člana Upravnog odbora Agencije za bankarstvo Federacije BiH sačini listu sa užim izborom kandidata koji ispunjavaju kriterije za imenovanje, njihove prijave neće biti uzete u razmatranje u daljnjem procesu imenovanja.

Prijave sa traženom dokumentacijom se mogu dostaviti lično ili putem pošte sa naznakom „Prijava na javni konkurs – Jedan član Upravnog odbora FBA - ne otvarati“ na adresu:

Bosna i Hercegovina
Federacija Bosne i Hercegovine
Vlada Federacije Bosne i Hercegovine
Generalni sekretarijat Vlade Federacije Bosne i Hercegovine
Ul. Alipašina 41
Sarajevo